

Agiunta 7: Carta da giasts (art. 51)

(Versiun dal 1. d'avust 2025)

a) Princip

Las chatschadras grischunas ed ils chatschaders grischuns han il dretg da laschar participar durant maximalmain 2 dis in giast a lur chatscha auta, e quai il pli baud a partir dals 3 da settember 2025. Per quest intent sto vegnir retratga ordavant ina carta da giasts. Il giast dastga exercitar la chatscha mo en accompagnament da la chatschadra ospitanta u dal chatschader ospitant. La selvaschina sajettada vegn quintada tar il contingent da preda da la chatschadra ospitanta u dal chatschader ospitant. In giast po retrair cartas da giasts (mintgamai maximalmain duas) tar pliras chatschadras ospitantas e plirs chatschaders ospitants.

b) Documents necessaris dal giast da chatscha

Per retrair ina carta da giasts ston vegnir preschentads ils suandants documents dal giast da chatscha:

- copia d'in document d'identitad valaivel;
- original dal formular da conferma per giasts da chatscha emplenì e sutscrit;
- indicaziun dals dis da chatscha cunvegnids (data);
- copia da l'attest ch'il giast haja fatg l'examen da chatscha en in chantun da la Svizra;
copia da la cumprova valaivla da la segirezza da culp da l'onn chalendar respectiv;
- copia dal certificat d'assicuranza valaivel.

c) Documents necessaris da la chatschadra ospitanta u dal chatschader ospitant

Formulars usitads per chatschadras grischunas e chatschaders grischuns.

Las cartas da giasts pon vegnir retratgas tar mintga post d'emissiun da patentas dals 15 fin e cun il 30 d'avust 2025 e dals 8 fin e cun ils 15 da settember 2025.

d) Ir al territori da chatscha

Il giast da chatscha dastga sa render a l'alloschi da la chatschadra ospitanta u dal chatschader ospitant en mundura da chatscha il di avant il di da chatscha a partir da las 12.00. Vehichels a motor dastgan vegnir duvrads mo ils 15 ed ils 21 da settember 2025.

I n'è betg pussaivel da midar posteriuramain las datas da chatscha tschernidas.

e) Ir a chatscha

Il giast dastga ir a chatscha mo en accumpagnament da la chatschadra ospitanta u dal chatschader ospitant. En accumpagnament na vul però betg dir che tal sto esser adina sper il giast. La chatschadra ospitanta u il chatschader ospitant ed il giast ston sa trategnair en il medem territori. Il giast sajetta a quint dal contingent da preda da la chatschadra ospitanta u dal chatschader ospitant. Directamain suenter che l'animal è vegnì sajettà, sto el vegnir inscrit en la glista da prelevaziun da la chatschadra ospitanta u dal chatschader ospitant e segnà sco tal (giast da chatscha). L'animal sajettà è proprietad dal giast.

Per il giast èsi pussaivel da sa participar a scurrentadas ed a chatschas en gruppas. Tut las prescripziuns legalas concernent l'ir a chatscha valan er per il giast.

Sch'il giast denunzia sasez, sto quai vegnir remartgà en la glista da prelevaziun da la chatschadra ospitanta u dal chatschader ospitant. Il giast è responsabel e chastiabel per tut las cuntravenziuns ch'el ha fatg cunter la legislaziun da chatscha.

f) Bandunar il territori da chatscha

Il giast po bandunar il territori da chatscha sco suonda:

- il medem di sin chatscha cun la chatschadra ospitanta u il chatschader ospitant;
- la saira da l'ultim di da chatscha suenter la fin da las uras da tir a pe u cun il vehichel a motor;
- il di suenter fin a las 12.00 a pe cun l'arma stgargiada (il dretg d'ir a chatscha na vala betg pli).

Sch'in giast da chatscha fa ina pausa d'in di tranter dus dis da chatscha, dastga el restar cun l'arma en l'alloschi tranter ils dus dis da chatscha, accumpagnar senza arma la chatschadra u il chatschader, ma betg ir sez activamain a chatscha, er betg sco scurrentadra u scurrentader.